

李文恭公遺集

李文恭公文集卷二目錄

湘陰李星沅石梧著

男概榛編次

梲

散體文

胡紹傳先生傳

張樸齋先生傳

張篤齋先生家傳

元配郭恭人行畧

羅君荆畦墓誌銘

通奉大夫候補三品京堂前貴州布政使李公墓

誌銘

承德郎邵陽縣學訓導張公墓誌銘

元配郭恭人壙誌銘

黃忠端公手札跋

五戒

胡紹傳先生傳

胡先生紹傳諱

楚北武昌人世居縣之金陂塘第

伯仲爲長讀書應試有文名旋以親年逮養舍儒而賈  
遠客西川市廛闐闐間得先生一言重於季諾節歲所  
入奉甘旨久之漸羸數以時歸省生事葬祭皆如禮視  
諸弟友愛肫摯終身無私財性喜推解赴義若渴臨事  
端直勁正面折人過惡少見輒避之旣垂老南還蜀人  
依依不忍舍率持酒攀餞歌詩太息以賢者之去不可

畱也元配雷孺人淑慎得尊章歡未幾卒繼配盧孺人  
婉孌柔順遇先生病噎偶發則衣不解帶藥裹扶持晝  
夜忘倦躬操井臼鉅細必勤待娣姒以和待卑幼以慈  
待姻族以敬人之賢先生者并稱兩孺人賢云子四宗  
麟宗秀宗蘭宗芳孫七人曾孫二人

舊史氏曰子始出守漢中稔先生次君紫田精於名法  
延助幕事比陳臬陝右復款致之每決一囚斷一獄紫  
田必悉心援律商榷至再嘗爲子述乃翁庭訓并乃母

戒以所習罪疑惟輕無少忽往歲從雲蘭舫太守襄辦  
回疆糧務尤切諭軍需浩費務絕沾潤歸啟行橐僅束  
脩百餘金始怡然色喜信夫紫田之賢有自來也夫爲  
善無不報不於其身必於子孫胡氏食德將未有艾矣  
因爲之傳

張樸齋先生傳

先生諱祈質字溇如樸齋其號也籍湖南長沙縣縣中巨族首推赤山坪張氏云先生少讀書貧未卒業隱於市市無老若少莫不稱先生賢一二悍且黠者望見顏色輒怡然下怙然從時出一語奉行惟恐後蓋其敦厚之節植之性行者深而睟面盎背乃相孚於不自覺此卽誠之驗也有某氏子醉卧五十金醒而忘之索諸他所先生聞訊亟持歸遺者曰翁賜也願以半壽翁先生

笑曰辭五十而受半利者不爲又以諭吾素義者不爲  
且自君畱之自我還之何德焉生平取受嚴至陸嫻任  
卹力所能逮不少吝教子以篤學立品無慕榮利戶庭  
之內端肅安和非以貧而全其天者耶生卒子嗣詳墓  
誌傳特傳其大者

李星沅曰世有陟科第紆青紫而內行不足道者矣若  
先生一廛爲氓孝於親友於弟信於朋友愿慤謙孫八  
十不衰子若孫則而象之皆恂恂儒者其食報當未有



艾語云廡仕不如全名厚獲不如廣德信哉星沅舊與  
先生鄰令子雲巖生又同年月垂髫過從親若一家辱  
先生偉視不以凡兒概星沅今亦與時俯仰耳附此志  
感且自媿也

附  
像贊

翁貌則怡而心無欺翁行則夷而守無疵靜檢一身動  
防四知族里之望士夫之師

張篤齋先生家傳

張氏爲長沙巨族簪紱相望傳經勿替者數百年於茲  
至吾鐵庵夫子及伯兄銅士先生以文雄長中湘師復  
出爲循吏遂初奉壽母五世同堂百順具備遠近知與  
不知僉謂封翁太夫子篤齋公立心制行粹然古隱君  
子實能種德以植福也公諱尙棐字克厚號篤齋系出  
江西南昌元大司農公世親公宗可始遷長沙代有清  
譽曾祖彥昇公朝楨祖用晦公承煌皆歲薦司鐸考秦

庵公應至貢成均公其仲子也性穎特少小爲文輒名  
噪族里老先引爲雋才旋以咯血棄舉子業專督吾師  
伯仲學吾師伯仲稟承庭訓蜚聲騰實自入學食餼同  
游嶽麓羅鴻臚袁侍講兩山長深器之癸酉大比吾師  
闈藝出人人以爲必售公覽之色喜榜出果領鄉薦三  
上春官俛得復失中間歸侍兩載及主直隸山西學幕  
公念吾師善病數加寬慰母以科第汲汲歲己卯公年  
七十吾師伯仲承顏上壽湖湘知名士類多分居子旨

製錦奉觴于于稱盛事迨辛巳春正公病篤猶手書一  
律畱示家人有教子以義方居心須坦白之句時論交  
相傳誦以爲公詩言學不區窮達蓋其天真獨葆道行  
誠篤中有自得之樂不知老之將至於虛賢矣公嘗襄  
建宗祠捐置祀田見義必爲好善若渴遇人渾渾無城  
府而於尊師取友尤摯以是家庭內外雍睦秩然言動  
有法皆公之教也吾師大挑一等以知縣分江蘇歷任  
丹陽鎮洋靖江諸縣悉以經術飾吏治興頌翕然辛卯

靖江災吾師爲民請命得賑如例倡捐助賑并舉三世  
祖榮政公明正統間出粟萬石賑饑事爲勸眾情踴躍  
民賴以安公雖不及親見之而吾師詩禮淵源顯揚有  
自益足徵義方之醇醇也公壽七十二歲

覃恩封文林郎配何孺人溫厚慈惠相敬如賓後公二  
十年壽九十二歲其生卒年月宅兆方向暨子孫戚姻  
世族具詳墓誌星沆謹核行實勒之家乘因憶癸酉歲  
偕弟星溶從吾師學爲時藝公偶一披閱必深嘉歎以

爲後起之秀吾師語次敬述屢爲星沅兄弟勗勉星沅  
兄弟亦竊自喜此事異日當有成也今三十七年矣久  
爲置吏無暇論文弟星溶亦學殖漸落徒負期許辱吾  
師誣譏敘次俯仰前事彌感刻不能忘云

元配郭恭人行畧

湘潭郭氏爲長沙舊族其女子皆能文章外舅雲麓公侍養家居數令兒女作詩課以自娛樂恭人早失恃氣弱善病顧性耽書史其祖姑母姑及伯姊六芳故工詩恭人耳濡目染繼稟庭訓卒業以是詩益進雲麓公擇壻益嚴歲丙子星沅讀書城南從羅湘舟先生遊雲麓公因見所爲詩文謬深器賞丁丑秋許字戊寅冬來歸恭人年已二十有二矣星沅孤露坦率貧賸食貧幾無

以爲養恭人至則盡易簪珥供菽水左右承歡惟恐母  
不憚母亦愛憐倍篤視若所生戚儔見之爭歎姑婦猶  
母女也已卯秋報罷星沅始客東川恭人揮淚送曰定  
省當代君惟祝眠食自衛毋傷遠別徒增母念自是橐  
筆幕遊聚處日少恭人上侍衰姑下哺嬰稚襄理家事  
翕然井然月數達手書附以篇什星沅藉紓內顧憂先  
是星沅患咯血遇事不當意或外感輒發發則狂吐盈  
椀夜不安枕辛巳夏秋頗劇母心愀然恭人醫藥珍調



至飲泣默禱願以身代又多方解臂恐貽堂上憂乙酉  
鄉薦後病稍間丙戌北返近館藩署三五日一歸省恭  
人率治酒相待舉案言歡月夕花晨更唱迭和如是者  
四年恭人方遘喉恙若斷若續肌肉漸枯常惻然私語  
曰是病倘弗瘳所不能割捨者姑恩未報答將以兒女  
累君耳辛卯恭人病愈復促星沅進取及早榮親壬辰  
捷春闈選庶常恭人馳賀書深以親年可喜愛日方長  
且著作承明適如外舅期許交相稱慰癸巳畱館母命

挈兒女北來道遠天寒旅斧匱乏蒸人卽景生慕眷戀  
庭闈往往形諸歌詠不自知其況瘁也旣抵京以次摒  
擋恭敬擗節如家居至訓課子若女諄切往復從不稍  
示姑息甲午奉

命使蜀蒸人謂此行當得士願毋忘昔年下第依人落  
拓時乙未復奉

命使粵蒸人偕行時秋霖塞塗跋涉八千里瀕危者再  
甫抵任母亦攜弟輩就養蒸人奉袂投懷悲喜交集問

安視膳形影追隨母意所之必曲爲體愛無弗至使署  
有瓊碧園花竹秀野恭人每侍母遊宴奉酒介壽母素  
不善飲亦時進一卮以答其意丁酉五月母命棹南還  
恭人依慕不能已嗣聞母患頭眩星沅乞假歸省恭人  
意始舒至家之日一門重聚預整春觴恭人旣快展慈  
顏又喜搗兒新娶婦娣姒姊妹姪女甥女在室滿室歡  
慶迎年極天倫之樂事恭人卯作丑息積勞彌月無倦  
容惟語及啓行則忽忽不樂至出門拜別涕泗交頤哽

咽悽愴不知其何以盡然傷心也戊戌三月塗次聞出  
守漢中之役星沅仍擬挈眷行恭人以女相長大當令  
于歸獨畱京師治奩具迫嫁事既歲而星沅近移中州  
恭人先後至體氣充溢較勝平時數舉酒屬星沅曰君  
授館職才六年三掌文衡一擢高等使旋未復

命先拜郡守曾不數月載陟監司遭際之隆近年罕覩  
其何以勉圖報稱上副

主知星沅聞之肅然也未幾星沅駐漕次聞以內無鉅

細皆蒸人經理蒸人亦不辭煩瑣隨事而悉綽綽有餘  
裕十二月十一日星沅回署值兒婦同病蒸人垂涕相  
告保抱扶持無晝夜十六日兒婦病漸平十七日巳刻  
同飯猶出近作寄女詩示我及申酉之交突患痰閉舌  
撝語蹇而蒸人遂不起矣二十年唱酬稠疊情話蟬嫣  
乃幽明異途竟無一言惜別不能言耶不忍言耶天乎  
不弔喪我嘉耦可痛也蒸人厚重寡言笑見事明決務  
持大體每覽古至忠孝名節輒義形於色無尋常脂粉

態當星沅巡視海嶠曾有

旨飭查陋規論者多模稜兩可恭人備述母訓郵書海  
南曰知君軫恤孤寒務行之堅確官貧未爲病也以是  
星沅復詩有清貧兩字寄拳拳之句雲麓公之沒也恭  
人間病亟大風駭浪扁舟省視雲麓公執手泣曰吾別  
無繫念惟汝兒女智珠幼孤而慧無所依是吾恨也恭  
人慷慨自任力請諸母以爲櫛兒婦尤篤於手足誼比  
歲有廉俸顧恤必周他如姻好緩急及善舉力所能逮

者無不愆。愚成之星沅性褊急不容物。蒸人委婉勸導  
俾之和平。待采伴以禮。御婢妾以恩。治米鹽叢錯以靜  
深坐端默若無事。而事皆立辦。生平無他者。惟拈題索  
句。角勝鬥捷不肯以能事。讓人握管必端楷。目短視讀  
書逐字諦審。嘗翦鐙伴星沅讀曰。君讀以聲。我讀以心。  
君聲固能清我心也。所著簪花閣小草。梧笙聯吟初輯。  
郭氏閨秀詩選。均付梓遺稿若干。將續存之。蒸人姓郭  
氏父汪璪嘉慶甲戌科進士。前任陝西鄠縣知縣。以文

行稱咸尊爲雲麓先生母氏吳早喪恭人生於嘉慶丁巳閏六月初十日戌時卒於道光戊戌十二月二十日寅時得年四十有二子三長樞娶道光壬午科進士湘潭郭君如翰女卽恭人女姪次樞聘戶部郎中益陽湯君鵬女三桓聘湖北安陸府知府周君鳴鸞女女二長適翰林院編修道州何君紹基子慶清次殤恭人以乙未

覃恩封孺人戊戌星沅擢今職



晉封恭人星沅自恭人溘逝夙行子立頓失左右手心  
煩慮亂執筆茫然無能爲恭人述第念半生依倚貧賤  
別離甫獲展眉遽悲永訣其孝養端淑相夫教子似有  
萬一不可泯沒者倘荷大人先生錫之銘誄光及泉壤  
感且不朽謹畧

羅君荆畦墓志銘

沅與荆畦伯仲論交二十年而荆畦日益摯居常過訪  
輒向夕不忍舍將遠別必握手淚下若有不能已於中  
者荆畦死沅宜爲銘君姓羅名大年衡山府學庠生曾  
祖登選歲貢生祖廷彥乾隆庚戌翰林嗣祖廷奎乾隆  
戊子舉人父繼祖候補從九舅弟四人君序長性狷介  
嫉惡褫嚴人有不善瞋目數之能改卽已亦不存芥蒂  
尤篤於手足誼仲弟亨裴工爲文每一藝出君贊賞不

絕口佻薄者至相姍笑而君怡然自爲諸生力學幽邃  
坐是困場屋道光辛卯仲弟舉於鄉君大喜曰阿弟文  
固勝余幸而得雋勝予自得也與沅交愛沅如愛弟沅  
年少負氣不諧流俗君獨遇以國士論他日同列建樹  
必推沅前歲聞沅將假歸先戒家中人曰石梧耆醜菜  
宜多蓄以備過飯烏乎孰知沅不果歸君遂不復見耶  
君以道光十六年正月十一日卒得年四十有 娶

氏生子二長

厚重彊記先君天君遂茹痛致疾次

甫 歲仲弟郵書至以 月 日卜葬於

之原爰繫之銘曰

謂天無知君有子謂天有知而子死天故沮君長不起  
咄嗟善人止於此我心感君君知己我銘君墓悲何已

通奉大夫候補三品京堂前貴州布政使李公墓

誌銘

國家歲入四千萬有奇內則司農主之外則方伯主之  
各直省盤錯糾紛總核分考近且日難一日論者謂堪  
茲任莫如長沙李公烏乎公以天下才大用大效無所  
不可鉤稽特餘事耳是何足爲公重謹約舉而銘之公  
諱象鵬字雲皋號雙圃明初籍長沙爲著姓曾祖石柱  
公祖倬齋公績學好善矜式閭里父燮亭公郡庠生仁

厚友愛以文行名於時生子二長侖圃公諱象鵠嘉慶  
己未進士官翰林院編修次卽公也公賦質英挺敏雋  
過人讀書十行並下幼從侖圃公讀書嶽麓名宿咸心  
器之稍長有聲黌序旣而捷鄉會入翰林遂充

國史館纂修文穎館提調治河方畧總纂石渠羣彥抗  
手交推公亦念侖圃公志緒未竟益勤著作以燕許文  
章自任嘉慶庚辰分校禮闈稱得士道光壬午京察一  
等出知直隸宣化府關南連值歲歉糧價翔貴公爲嚴

禁奸販安戢屯戶分厰煮粥民無化離郡有柳川書院  
分俸新之增膏火明條約按月五課公餘進生徒講貫  
曾未三載掇科者五拔萃者六邊郡奔陋之習至是一  
變旋調正定府知府再調保定府知府保定畿輔首善  
繁要甲於天下是時總督大學士蔣公攸銛治尙明察  
寮屬屏息那文毅公彥成繼之風規尤峭厲公整紛剔  
蠹舉重若輕親治文卷行所無事每遇庭論辨析必反  
覆自暢其說無少屈撓同官或相顧色沮而公持正自

若大府倍倚公如左右手

成皇帝駕幸木蘭公迎謁

天顏溫霽獎勉至再蓋稔知公之賢可大受也丙戌升  
直隸通永道調河南糧鹽道下車後體察機要著理漕  
說嚴飭並示禁差役藉顧糧剝攔截民船州縣便於轉  
輸弁丁無不懾服又請復潞鹽官運明定章程四年中  
令行禁止兩河人士至今頌德勿衰己丑丁外艱癸巳  
服闋入



見甫四日卽授江西吉南贛寧道地當東粵之衝犬牙相錯連山伏莽出沒無常轄境遼闊多瘠土州縣幾不可治公埽除宿弊整飭嚴明地方秩然就理值贛州大水斗米千錢公設法招徠汎舟雲集市價頓平仍出廉俸助賑活人無算信豐縣民某因姦謀毒本夫誣弟殺兄供詞甚狡幾成寃獄公切究得實及權臬事姦夫姦婦問如律丁酉擢江蘇按察使旋署江寧江蘇布政使陶文毅公澍方督兩江引與同心政肅刑清一時之盛

戊戌調貴州按察使會仁懷縣軍務兼籌轉餉事竣得  
從優議敘逆黨株連頗眾公悉心研鞫無縱無枉庚子  
擢貴州布政使首禁漢奸盤剝苗民以遏亂萌倡建尙  
節堂收養嫠婦以正邊俗捐置石洞坡義園祠祀鄉先  
達之有德於黔者以垂政績百廢具舉澤久益深甲辰  
乞假歸官民間聲臥轍流涕奔走公亦惓惓不忍舍然  
終不肯畱矣乙巳入都奉

旨以三品京堂候補仍乞假歸公勇於任事精於料事

鏡燭犀剖動中肯綮他人三四年不能了者公以旦夕  
了之他人千萬言不能決者公以片言決之至於錢穀  
冗雜參互錯綜羣苦勞絲難治公則條分縷析若網在  
綱有條不紊且從容談笑間以雅謔似絕不經意者與  
人寬恕伉爽表裏如一是非曲直無少假雖人心如面  
或轉以此尼公而公不屑顧也天使如公數輩擔當世  
務經畫封圻必克建樹非常幹旋元氣大有裨於

國計民生何止以東南財賦之區惜不得假手於公爲

之補偏救弊耶公泊於榮利家濱漁樵渡自號漁樵散  
人當居變亭公憂輒不樂再仕祇以

主知優渥義難忽然舉凡立義塾以待族人之讀書捐  
義倉以待鄉人之緩急置本邑卷價以待孤寒之就試  
皆遵變亭公遺命獨力成之居恆追慕俞圃公築棟懷  
堂見志嫂王宜人從兄湘帆大令年皆八十公每過從  
必依依其孝友慈惠老而彌篤亦可以風世矣公解組  
優游合林下十八人繪湘中耆英圖廣徵題詠古稀已

近矍鑠健啖步履勁捷望若五十餘人方命駕入省俄頃間無疾而逝遠近聞之莫不駭悼泣下享年六十有八子家驊家驄星沅於公誼爲甥舅皆有媯所自出公采芹之日星沅甫周晬藐茲後進宦轍略同公每寓書告戒及躬聆緒論懇到詳勉常若所親故於公之立身行政微窺厓際誠未能表揚萬一要未敢以不文辭銘曰衡嶽英靈湖湘間氣早陟詞垣洵膺藩寄脂韋如雲孤標果毅孰營城府闢以簡易艱鉅奚辭疆禦奚畏人

疑凌鑠我行其志敷歷中外

眷隆簡畀時行時止舒卷如意所去民思公望延跂長  
沙耿天無何星墜城南允藏以昌後嗣

承德郎邵陽縣學訓導張公墓誌銘

張公第蓉諱廷鏡道光乙酉科優貢生就職訓導歷署  
祁陽新化邵陽縣學先世爲宋宣公後祖居浙之山陰  
康熙中始籍湖南善化代有隱德皆不仕公兄弟四行  
三幼沈默寡言笑內秉庭訓出就外傳束脩如成人甫  
冠舉茂才食餼精選學說文文名藉甚旋以優行貢成  
均得官訓導學使今協揆壽陽祁公尤愛重之秋闈十  
四次薦屢躋同人知與不知皆以不遇爲公惜而公視

之泊如鍵戶讀書俯仰自若嘗謂平生有一得必有一  
失有一喜必有一憂科名與遭際造物若隱相齟齬不  
令快然於心者返之此心尙無不快孝友恭儉赴義若  
渴捐助賑貸無少吝惟時政有大興革及四方災眚得  
聞於人輒歛歔太息竟日或借飲酒賦詩傾寫懷抱以  
此知公不縈心於遇脫幸而遇將必出所學以匡濟而  
非止獨善其身也選人某偕抵京師病瘵幾殆同舍生  
并僕逸去公慨然獨畱秤藥量水如所親選人賴以不



死官新化訓導諸生某以事被逮公廉其枉力爲昭雪  
出諸獄絕口不言此皆當世之所難矣喜論斷古今人  
物往往夜闌燈炮子姪輩環列聽講必爲旁引曲證窮  
事情之正變素患痰喘氣咻然口微吃則紆餘以出之  
大旨要於勸善規過易簣之前夕猶反復切戒曰讀書  
人宜自卑不宜自大宜自重不宜自輕於乎斯言豈獨  
後生小子當誦法終身與子與公交最早且篤又申以  
姻婭公從子恩衍恩準卽子甥每爲述公誨迪感激泣

下故知公綦詳公學行底於成壽周甲死復何恨顧聞  
公殮時目微瞠似未忍舍去者蓋是時太翁年八十一  
矣公老而孺慕侍養朱終魂魄依依猶定省溫清間也  
公生於乾隆五十五年十一月初九日歿於道光二十  
九年十二月二十九日將以三十年三月二十九日卜  
葬河西之鴉鵲塘元配劉孺人先公十四年卒繼配胡  
孺人子一恩濟娶羅氏女二長字子姪檢次字勞文翹  
孫一廣朱爰爲之銘曰

公學賅博其言鑿鑿公性敦約其神落落篤信人師崇  
好天爵示子弟誠尋孔顏樂湘水清涵湘山峭嶸棲神  
啟秀翩彼鴉鵲

元配郭恭人壙誌銘

恭人姓郭氏名潤玉號笙愉湘潭進士汪璨公次女嘉慶戊寅冬來歸孝敬純明克全婦職道光戊戌從宦河南以是年十二月二十日卯時卒距生嘉慶丁巳閏六月初十日戌時得年四十有二子三櫛樛桓女二長適道州何慶清次殤恭人以己亥十二月十一日歸葬善邑河西張家坤午山子向兼丁癸其夫李星沅爲銘寄諸壙曰

予美亡此歸藏同穴誓何時忘

黃忠端公手札跋

右黃忠端公手札十二論守禮論箸書論經世大節侃侃如見其人若朝廷用舍不樂太驟君子出處不樂太輕及孔歎微管孟慨纓冠等語皆自任以天下之重卽所謂業已從事無拔身之理也獨以一肚子不合時宜欲假數年坐臥松間鉏雲讀書卒不可得而徒懸此寤夢刻刻在東郭北山公之志良苦矣予自移督兩江亦以絕肋彎十石之弩也會遘疾請假摩挲此冊至拈筆

對聖賢此心便靜正喜得卻病方又讀至如此重擔何  
時到家輒不禁掩卷太息古今人殆有同慨耶

五戒

病歸跽伏頗畏人事爰立五戒自守幸知我者諒之

心主百體令爾病在心爾心在定慎毋不馴龍性而倚草木爲命

右戒投藥餌

不官卽民官非周親豈當解組而復拖紳炙手可熱羞因人惟象有齒乃焚身



右戒交當道

言不能行乃多疾况無言責敢騰口已去婦談井曰心  
匪他顏之厚謀政在位致則否

右戒論時務

肥甘本毒藥久之令腸腐日與病緣徒自苦靜蔽菜根  
長閉戶

右戒赴招飲

口銜石闕手可斷爾尙何爲勞病腕外人目笑比河漢

右戒作手書

李文恭公文集卷三目錄

湘陰李星沅石梧著

男

概 榛 梳

編次

駢體文

寄蔡雲帆明經書

上陶雲汀夫子書

上陶雲汀夫子書

上陶雲汀夫子書

上李海帆先生書

復李海帆先生書

復宗蓉船明府書

謝楊芝樵啓

索楊芝樵醃肉啓

謝林小牧啓

譚醒漁詩序

秦半魯春燈曲序

寄蔡雲帆明經書

柯亭識曲一椽枯竹之聲湘浦懷人千尺桃花春水  
長陽小住曾寄桐吟而子墨相將難紓葭湖憶自里門  
賦別于今百有餘日矣先生以白紵之清才入紅蓮之  
幕府揮虎頭之妙筆攬鷁首以豪吟幾點君山青到巴  
陵之酒三吳帶水碧環揚子之江渡黃天蕩以開胸駐  
白下城而覽古問南朝之金粉花柳依然望北固之樓  
臺人家何處春晴瓜步飛來一幘雲烟海國糧艘撐出

半船書畫箏笛徘徊於京口河流躑躅於津門古之人  
少文臥游元武散逸未足多也況復強臺直上健弩更  
張踏曉月於蘆溝訪晨星於燕市舊游歷歷驅繞策以  
重過前路茫茫仗祖鞭而猛著陳思云飛軒絕迹一舉  
千里先生有焉星沅懶勝嵇康迂同辛大當硯田之就  
廢惟磬室之徒懸迺處囊自況毛生而伏櫪獨逢伯樂  
借齒牙之餘慧教咫尺角以驂駒至於贈別驚心臨歧握  
手聽排衙之譙鼓樺炬生愁譜疊曲於陽關柳枝忍唱

此固因緣之數合抑惟意氣之交深由是山河伊阻日  
月不居鳥戢翼於桐枝魚散芳於萍沚佛國曾栽之樹  
香雨能飛良工手種之花東風解惜蓋自琴尊東閣許  
隨從事之班兼之幫帔西華卻憶故人之子每當曉衙  
官散畫閣燈涼或凭闌以指天星或聚米而陳地勢或  
縱談人物冰鏡同清或細意推敲官商代酌旣朱墨之  
附近始白黑之微分斯卽裹糧而與游亦負笈所深願  
也惟是故土可懷小人有母蔭闕豈忘憂之地桃源非

久住之家當此細草成茵雜花生樹剩雙柑之斗酒怕  
聽鶯啼書七字以緘封難憑雁寄遲鄉關之消息悵心  
緒於離居未免壯思銷沈幽懷贅亂殷深源之鄭重翻  
達空函曹不興之靈通偏多誤筆撫芳華而自惜感知  
遇以難償覩絳霄之卷舒念朱絃之逸響此日倚樓南  
望彌思良友於停雲何時翦燭西窗共話巴山之夜雨



上陶雲汀夫子書

星沉久睽溫霽飢荷厯垂當三易寒暑之餘猶兩奉招  
徠之諭方幸慈暉重謁進下士以輸忱俄聞吉語遙傳  
指上游而移節行行且止惓惓難忘前雖專達魚函究  
未暢申繭思夙蒙鑒宥用再縷陳竊以威鳳來儀鷓鷯  
隨而羽戢扶桑始旦葵藿向而心傾凡伊擇木之倫共  
切睎陽之想若雲龍絕跡靡有常規將風馬追蹤迄無  
定所維我中丞夫子大人望崇一德遇協六符民奉以

父母稱帝倚爲左右手乞畱恂於茲宇百族攀轅問迎  
俛以何年八方企踵星沅懷仁若渴慕義如羶神飛皖  
國之樓目送漢川之棹倘片帆甫卸而雙蠹先馳芟舍  
之蔭猶濃膜拜之聲迭起或擁旒晉嶠界畫并梁或建  
鉞江寧路懸吳楚進則旅資莫給退則井養終窮偕義  
日以經天鄧林化杖凌仙山而策漣弱水迴舟雖斯愛  
斯傳不知信否而倏遠倏近敢卽行乎此星沅之不果  
來者一也或者又謂子路從而後未迷止宿之區顏氏

瞻之前卒承善誘之訓星沅景行自矢就正良殷但遂  
振趨豈艱跋涉矧勳名之超越徧輿頌以掄揚胡爲臆  
頌是憑遽爾臨河而返然而踐春間之約則已踰臘底  
之期合賓榻不爲徐懸恐主幕只堪却入圖新匪易舍  
舊無辭歌相府以裴徊爭誇淥水惜夫容之遲暮肯怨  
東風勢必小住爲佳細流不擇謬席珍而待聘享傲帚  
以求沽倦鳥投林一枝安託啼鳥繞屋三匝何依爰謀  
蚊睫之巢頓益豬肝之累縱得眊眊成飾咳唾生珠而

遠挹西江幾等枯魚之銜索甘辭北海孰容厲翮以搏  
霄此星沅之不果來者二也或又謂數仞宮牆昔窺美  
富萬間廣廈今許激昂列春官桃李之門樗薪足貴出  
宰輔參苓之籠洩渤皆珍似無難引巨浸於硯田采華  
腴而筆耒度居高臨下之勢受博施濟眾之偏卽在星  
沅爲無厭之求而在吾師仍不費之惠豈知三旬九食  
旣飽旋饑一暴十寒能生亦罕轉瞬賓興之典驚心服  
闕之晨素鞞當除朱衣預祝雖適彼樂土何待來年而

復我邦家曰爲改歲桃花源好訝漁父之思還桂樹山  
幽悵王孫而招隱始欣啖蔗忽類握苗虛種植之初懷  
徒萍蓬之增歎雕梁乍熟將歸題去燕之襟泥雪空畱  
到處印飛鴻之爪此星沅之不果來者三也且夫來而  
不果來者此日之遷延不果來而來者此衷之嚮往星  
沅才原駑鈍詎希伯夷之知質比磻多誠貽君子以賤  
撫鴻毛其未遇覺龍性之難馴誓屈首以研經則飢同  
臣朔強低眉而袖刺則懶勝禰衡忝邀顧恤之隆永矢

服膺之懷鼇戴石而彌形其重  
鉅馳河而漸測其深  
科第羞人負青雲之期許  
飄零故我剩白撰之經營  
高厚未酬感慚愈集冀假背城之戰  
載登選佛之場幸而蟾窟霏香  
鹿鳴奏雅固宜摳衣函丈撰几  
軍門度駕繡之金鍼訪鴻渠之玉律  
至若擲揄康了瑁璪依然是直羅  
隱之更生漫擬劉蕡之逸事亦惟有  
羸膝履躋握槩提鉛附卿月之末光  
仗福星而造命分千樹一葉之影立  
被濃陰滅四溟數滴之泉便滋甘雨  
斯則星沉所反復

圖維而無以易者也不敢請耳固所願將終身接警效  
之親雖欲從之亦末由惟至道極仰鑽之境匯蒸湘而  
浣筆難寫恩波削竹簡以摘詞稍紆結轄

上陶雲汀夫子書

歲前拜肅復箋聞有述職之請迄未達也數於餘山方伯處敬聆彤騶往復備極恩榮輒以手加額爲抃慶者累日竊惟古皇之敬大臣也恆逾於體羣臣而公輔之酬異數也尤艱於酬常數如我夫子大人誠孚帝鑒九重前席而咨利溥仁言八方舉踵以聽膺十二辰之晝接陳數大政於對颺喜溢天顏甘分玉食惟天子待重臣如友故收不世之奇勲惟吾師治國事如家故荷非



常之恩遇主聖臣直益贊舜俞揚拜之隆近代未有方  
今載宸謨而宣化旋節府以頒春秩晉封圻名尊柱石  
綸扉枚卜萬口同聲星沆蹈德詠仁固無事諛詞之善  
禱而持盈保泰妄思效瞽誦之愚誠蓋受者之榮不如  
聽者之豔而親者之分不如忌者之深故物望有攸歸  
卽觀聽之所屬抑主知有特眷卽媚嫉之所開伏願夫  
子大人愛身如愛國省事以省心大美不居爲禹皋之  
推讓宏施莫究如川嶽之高深慈惠以宅羣生而需之

饜飫果確以肩鉅任而析及精微集益於眾思有定見  
非有成見運意於法外不矯情終不徇情儉從之役綦  
嚴猶防蔽於近習夤緣之路胥絕又恐售以微長故舊  
無少遺必相約以準繩無開倚附聲威之漸本支有分  
潤必重戒以韜晦無負廣置田宅之名凡茲膚見所及  
窺悉爲盛德所包舉亦旣實心實政表當代之偉人允  
宜必慎必恭篤寵綏於晚節雖燭龍之耀豈借螢光而  
井鼃之鳴或諸鳳吹狂夫之言聖人擇焉此吾師不屑

采之葑菲而星沉必欲獻之芹曝也自辱蒙慈訓十二年矣學問功名一無所就徒負師恩近爲餘山方伯分司書記爰因郵便附陳依悃併上前槭虔叩道安臨池惶恐不知所云

上陶雲汀夫子書

春律初調會修蕪問秋陽在望逾篤葵忱昨過裝池家  
伏讀大箸海運四律仰見夫子大人雲章挾漢元氣扶  
輪化險爲夷妙斡旋於日月功高不伐宏集益於山川  
先之勞之其難其慎邇稔河漕分治重運自可踵行變  
通在一時美利在萬姓襄平相國夙投鍼芥近卜盍簪  
有稷契之和衷無洛蜀之異黨上紆宵旰下奠黎蒸此  
三江之奇福洵四方所同慶也星沅備書自給學殖未

逸幸附託於高枝，悵在山之小草。秦關徑窄，范釜塵生。  
養既薄，夫庭闈分彌慙。於家督將過，除夕寫終葵嫁妹  
之圖。漸近中年，益高密多兒之累。轉瞬長安春早，驚心  
舉子忙時。迨未雨而綢繆恆不寒，而慄慄深蒙覆幬。重  
乞滋培，遠憐原憲於繩樞。坐致晉師之館，穀硯不舛而  
有穫。筆非樹以能花，雖循名核實事本虛糜。而挹彼注  
茲義同周急，被殊施於格外珍薄。植於籠中，拓清沼以  
依蒲魚游。自樂增束芻於伏櫪，駑馬皆雄。庶幾六合輪

困瞻卿霽而無非慈蔭一條衣帶溯江水而不盡恩波  
千里蟻銜五中鵠跂

上李海帆先生書

夫秋皋霜警而豐山之鐘鳴天杪風噓而清河之樹應  
元感齊乎針芥同聲授以機緘况振丹鳳之九苞百禽  
整翼銜燭龍於萬丈四隩晞光韓荆州識等候封郭有  
道望均霄漢若弗克見思何可支伏惟元氣扶輪帝心  
特簡宅七縣一州於衽席宣五禮六樂以甄陶崇巖宇  
於丹崖烟霾曉淨濯澄懷於鏡石冰鑑天開吏士輪忱  
氓獠頌臆始則黃童白叟爭迎細侯之車繼而袞衣繡

裳私詠我公之什傳霖下尺龜兆回春伊鼎烹鮮雁戶  
飽德永之望慈父母恐挽鄧而不畱帝曰作朕股肱許  
借恂而難久靈鵲集而牙幢載建彤龍啟而絲綸式頒  
公之位遇日隆公之敷歷日遠矣星沆蠖屈半生蟻銜  
寸埵石棧飛猿之路會上青天金臺市駿之區空歌北  
地學賈耕而自給投禰刺以何從聞司馬公之名霆雷  
共震懷杜少陵之恥雲泥異塗乃荷采及菲葑寵之咳  
唾焦桐析爨審音而歎琴材古劔沈芒望氣而占星野



遠召郗超之入幕復乘殷羨以郵書雖淥水紅蓮未依  
相府墨鱗錦字尙在石城然而遲暮相逢珠已還而有  
淚拊勉交至纒皆挾以無聲廣厦張而寒士顏歡醴酒  
設而穆生心醉昔卞和懷璞砮砮咸集於庭師曠調鐘  
笙竽胥獻其技躍蕤賓於水面似識將軍奏晨風於樹  
間宛廡同調撮土之累秦岱蹄窪之趨滄溟道大羣歸  
表正影附嵇康命駕仍阻山陰之遊高惠神交欲訪夢  
中之路僂指鸞書南錫騶從北發行當摳衣道左執旌

門下脩士相見之禮賦樂且儀之詩松塵徐飛參豨俯  
進星雲快乎先睹春風被於坐中邀一顧於風塵恩榮  
知己結三生之香火佛重因緣或者哲匠裁成不盡白  
鹿青牛之選庶令鹽車駑步亦隨丹蜺紫燕之英

復李海帆先生書

梅花隔歲先拜春風柳色未新倏  
浥朝雨快一識於萬戶飛片夢於五溪  
遠道絲絲流光鼎鼎候踰大夏思積  
小年忽枉惠存語長心重莊詠再  
四感極抃俱伏惟翊贊清時誠孚

帝賚隆名寵以銀管巍望繫夫蒼生  
夙蒞甌氓歡答海潮之響故紆宦轍  
重開衡嶽之雲來暮方賡去思又起  
地形天險出羣此材君明臣良知人  
則哲復畀以英蕩

特簡以奧區羌樹番煙端繡衣而直指叩牛笮馬詹羽  
蠶而誠輸柏灌軒裳烏蒙仰軾

九陞且超遷不次三川咸舞蹈以迎古有貴鄉歌呼館  
陶攀泣者其楚蜀之謂矣星沅嘗以楚狂爲蜀客者也  
回首前塵宛在心目厚辱左顧難爲別離竟思攜三尺  
琴束一襲被騁壯遊而附鳳訪陳迹以磨驢於焉峽鑿  
髓靈浦沿魚腹進淵雲於十部坐李杜於四隅謁丞相  
祠堂上希開濟過君平卜肆諦問升沈熱腸欲然澆以

峨眉之雪俗胃如闕浣以錦水之波取支機石而還書  
薛濤箋幾遍主客之聲華藉甚山川之眼界曠如豈不  
軼題橋之侈談暢載酒之逸興也哉無如故土可懷小  
人有母帆隨湘而自轉林返哺以相依欲往從之是用  
不集行有日矣其何以堪惟當詔臥轍於塗止嗅鞞之  
輦願岷江萬里流入重湖指井絡八星近聯軫野載移  
玉節還鎮銅官我猶騎竹之兒童公撫憩棠之父老預  
操券契延伫旌麾載渴載飢且祝且跂至以行卷汚墨

獎假過情信善誘之循循益內顧而赧赧硯冰未解清  
晝間楮絃徽不鳴綠窗小病待繡平原之像遲賡雜佩  
之章蘭楮顰眉薑芽斂手蒲香近矣荃榛何如絳騶啟  
夫簞城白鵠竢於湘曲雲麓拱揖歡條繽紛續珠咳於  
潤襟申萍逢以要約曾持牛耳交推南國之主盟寄語  
蠶叢敬接西方之生佛瑣詞上報伏祝珍綏

復宗蓉舫明府書

星沅識少丁鴻訛多亥豕窮居白屋兀守青瑣廿六年  
蠹簡蟬編本持蠶而測海四千里蠶叢鳥道曾橐筆以  
依人自同驥阜之牛風塵溷跡敢立鷄羣之鶴月旦邀  
評乃高軒道出長沙下士幸通短刺接龍門之馨欬朗  
若披雲陳蛙部之詩歌慚非鏤月謬附同根之雅竟忘  
采菲之嫌自折柳河橋望雙旌而路遠想桃花潘縣刻  
寸楮以神飛茲者復承明府折節下交馳函寵召命阮

瑀爲記室厠谷永于籤曹孺子何人許下南州之榻正  
平列坐叨陪北海之樽以後進而作先生非嘉賓而親  
賢主乍奉公餐之厚意適如負笈之初懷惟是燕壘泥  
香久住烏衣門巷牛油品賤亦充葯籠參苓被薰陶則  
坐永三年授句讀而交聯兩代人如鶴懶暫息羽以傍  
高枝客比鶯遷肯求聲而僻故侶雖廉泉讓水枯魚均  
可分蘇而舊義新情窮鳥仍須決擇甫同盟而方命徒  
顧影以增慙深維知己之恩敬進使人以拜譬置穆生



之醴酒未飲而情甘如吟白傅之詩裘不衣而心煖撫  
兼金之在笥趙璧同完感屑玉之相投陽春難和計庚  
郵其未遠待子墨以重宣此時入幕緣慳空悵芙蓉於  
深水安得升堂選備竟成桃李於公門率著蕪詞藉鳴  
藿悃

謝楊芝樵啟

蓋聞意象生春爲良醫必爲良相指端造命能活國斯  
能活人世固有扶神農氏之奇蘊太倉公之奧青芝赤  
箭脩金液以昇華紫蠹紅鹽鍊銀丸而御氣受桐君之  
方術而輟底魚蘇登葛氏之門牆而堂前鱸集有如長  
沙楊君芝樵此其選焉芝樵逸情雲上雅抱淵沈瑯嬛  
游福地以題名緇帙啓洞天而廣學爰於虛白之室旁  
覽岐黃之文以不談談非越人之安越得先中中本盧

醫之自醫巨眼如箕選東漢六徵之技虚心似竹奉南  
豐一瓣之香此吾友張子雲巖嘗爲余津津言之余固  
欽佩焉而未識也戊寅臘初患癰疾猝遇庸醫猥以蛙  
蠓之材投之虎狼之劑當是時也藥鑪冬盡紙帳春來  
驚爆竹以迴腸恍如秦鹿入蘆花而氣喘大似吳牛痛  
悔噬臍謁三醫而何處危親執手剩一線以相延阿母  
顧而恟惶少婦爲之嗚咽星沉亦無如何也除夕雲巖  
過予始以芝樵來視芝樵明鏡當胸智珠在手照人肺

勝歎叔寶之神清診我膏肓識仲宣之體弱爲擣龍宮  
之藥入社攢眉疑驅獺鬼之針燂湯滌臟陽回黍谷廢  
屢初飯胡麻脈續桃膠慷慨還貽嶺桂雖三生有幸應  
多香火因緣當九死無妨益信慈悲解脫此六一中大  
隱亦百五日奇逢矣嗟乎葉門鼓響恍聞疏越之絃雍  
社簫聲誰續廣陵之散橘何泉而有井雲化蘇耽杏何  
樹而成林山棲董奉歎良師之澤杳信妙道之傳訛又  
況皮相百方目迷五色夏蟲孟浪語冰凍以茫然社燕

漂離問天高而瞽若覓零星之活計吐舌生花索紙裹  
之家私蒙頭起草千金方之尙在六度法之已亡顧此  
雞羣俄驚鶴立聊爲犬繫便見蛇飛怒韓伯休名訝長  
安公子訪皇甫謐書傳元晏先生喜瘦腰之沈郎識解  
鷓之彭老將今吾之依傍俾故我以安全惟是巧不如  
人辛太邱拙將焉治窮將入骨陳孺子貧可能醫仰丐  
神鍼痛貽法灸此日丹砂秤藥人看劫後紅羊他時碧  
玉銜環我亦君門黃雀

索楊芝樵醃肉啓

昔陳思王製七寶之羹沈隱侯核九變之味蔡經擘麟  
脯以行酒虞悰切龍雁以霏香類皆勝地尋歡老饕共  
笑吟朋滿座大嚼能豪從未有日費萬錢力却垂涎於  
戶外珍羅八物自稱果腹之主人者也矧乃乾肉名腊  
束脯供修憑赤手以成功受紅顏之拜謝椒花易辣費  
玉腕之經營鹽性能鹹仗金閨之調變如彼易牙之味  
實爲美人之貽閣下自宜高做瓊筵折書芳柬匪過屠

門而快意直偕家釀以飛觴何乃秘以仙厨藏之內府  
豈伊曹翹恐我輩未能遠謀竟作陸游知當日本無骨  
相於是油蒸校尉糝熬將軍詣赤里門索紅虬脯必嘗  
異味請占他日之期歸遺細君尙待東方之割周姥與  
人同者公然今日膳夫楊君爲我分甘願進數行俎表

謝林小牧啓

春風一夜催開長樂之花小圃半弓新種寄生之樹瓜  
何爲而附葛苔何事而同岑蓋連抱與交枝物其有矣  
想異文而合愛禮亦有之維閣下之於星沅也詩書味  
洽香火緣深時遊珂里之門遂訂紵衣之雅方幸風塵  
知己念我友朋何圖日角奇童謂他人父做北齊乾嬰  
之故事修東關嫁子之希聞雖不屬於毛僧父難生此  
子而有文在手佳兒適叶長庚託舊誼於蔦蘿情原松



柏締新恩於螺贏事別螟蛉君如鮑叔分金取懷而予  
我學翟生兼愛執手以名客兒乃靈運之幼稱寄奴亦  
德輿之小字以似以續公然樂取於人同與同胞何用  
歸謀諸婦從此兩家過從郎罷齊呼百歲康強阿多漸  
老笑犀錢之利市此事無功分玉樹之光輝自他有耀  
盼得袞師長大當知則友其兄只愁濬仲超騰未信予  
仁若考甫添丁而自慰又抱子以交忻撫媵寄之掌珠  
重摩娑而頂賚盃浮縹碧聊存傳鉢之心箸飾雲牙妙

稱和羹之手賜筠生而作字儷松質以常春觀茲鶴羽  
翩翩共羨林逋之子願爾龍文照耀肯云李嶠之兒

譚醒漁詩序

夫白雪詞高刻羽今傳郢曲藍田署冷哦松古屬丞曹  
紀風騷則屈宋同鄉供獻詠則章岑列座咸識地饒勝  
境益產魁奇從來天造詩人半投閒散楚北醒漁先生

侍郎之文孫而德齋司馬之哲嗣也生珥金貂齒  
牙編貝幼嬉蠟鳳頭角岐嶷元微之初日觀梅胃腸交  
映王景文晚風濯柳舖啜亦佳甫從外傳以游遂被聖  
童之目楹書口誦記臣朔四十萬言秘笈手鈔聚崔約

八千餘紙人且謂雛鸞展翼便集丹邱神駿奔蹏立呈  
紫廡矣既乃燕京振策鯉對趨庭賦工部北征向長安  
西笑當是時也烏衣儂從銀珮招搖車連孝若之茵戶  
擲安仁之果未免毬場跌宕珠埒縱橫鷄蹠鵝肪歷歷  
五侯之饌雉頭狐腋羅羅七寶之箱駐雕韉於柳鞦花  
殷敞綺席於金迷紙醉寇萊公之廁潤蠟淚盈堆甘興  
霸之軸轡繒絲結采狀風雲於奢闕極烟月之併張又  
況翡翠屏間薜蘿堂下悵美人兮何處思公子兮無言

鴛牒三千散氤氳而結使鹿車五百搓歡喜以成丸往  
往蜜葉裁箋瓊枝照髻歎華年於錦瑟續舊夢於羅幃  
唾碧袖以痕消燕皆悽惋漬紅裙而魄化蝶亦勾畱彈  
指前因驚心陳迹無何芳韶東逝薄宦南來而先生已  
介然不屑也葫蘆問短誰云陸子才多鸚鵡詞工空見  
禰生刺滅五斗折腰而難耐一官屈首以何堪然猶荀  
令香熏夏侯筵啟紵質長沙之庫債帥酣呼錢羞杜老  
之囊酒兵角逐擫笛而驚潮亂下持杯而喝月倒行鋸

屑乍飛玉山欲醉碧海青天而外杳矣知音哀絲豪竹  
之餘蕭然感舊崔灑則王昌十五繁欽則約指一雙火  
漸收炎地難藏熱傲冬郎豔體寫秋士愁懷倚樂府以  
長吟擊唾壺而盡缺詩之作君之情也其能已乎僕萍  
蓬識面邂逅同心緣諦靈山證法和之香火夢吞丹篆  
認東野之須眉與休文伴終朝作平原游十日顧倚葭  
而自笑歌折柳以難禁舊雨三生春風一度展君少作  
益我遐思所願約己以繩視道如尺閱繁華之小劫瀛

流濫於么絃吹簫以學鳳鳴雌雄聲應按劔而韜虎氣  
鈎棘光鏘撫場和抱德之衷究返樸還淳之旨偕宓琴  
而奏雅琴趙幟以張軍采庶子華擷家丞實從此胚胎  
漢魏一篇追正始之音矩矱高曾五世衍竟陵之派

秦半魯春燈曲序

千秋樂府清平傳李白之詞三日歌梁宛轉奏秦青之  
曲和聲依永由來尙矣我

朝自孔東堂洪昉思宗笠翁諸君類能振竹調絲泛商  
流羽聽風聽水翻舊譜於霓裳鼓角鼓宮換新腔於天  
籟然而高唐地遠下里音多俳優雜而箏弄紛呈雄雌  
乖而葩華散列紅牙按拍顧幾誤夫周郎素面彈箏調  
未諧夫莘老非陽春之和寡抑句意之會難也吳中半



魯秦君本風雅才得江山助家在洞庭明月湖水春濃  
詞如楊柳曉風屯田名著嬾持手版脫略公卿偶仗腰  
纏敖游荆楚當此計然市隱雷義錢豪折陳劬若山邱  
視孔方如塵土往往綺羅買笑蘭麝尋春浮大白以狂  
吟付小紅而低唱橫箏檀板赤鳳交飛流管青絲黃鶯  
細囀仿漢宮之連臂滴粉搓酥輸錦段以纏頭裁花剪  
葉雖較之旗亭把盞洛里盟詩不是過也未幾黃金散  
盡絳蠟燒殘判袂甘州移尊苦縣花有酒而慘淡月無

恨以裴回十年翠繞珠圍繁華似夢幾處歌樓舞榭太  
息如聞乃分北里之間情別訂西崑之善本時則星沙  
春早火樹花開霞飛閃電之窗煙鎖排衙之戟鰲山鳳  
輦燭天則綵燄千重兔月羊燈埽地則珠塵十斛指熱  
劫於九華筵畔演仙音於七寶屏間雁柱數行已定龍  
香之撥鶻絃一闕當新鳳羽之調人且撫時樣而攢眉  
對移宮而束手矣半魯約神通律選韻含商節奏授於  
口中鉤柱傳於指上製紫殿無愁之曲徑過行雲做元

宵不夜之城勾留落月一唱而繁花亂下三終而貝闕  
齊明魚龍曼衍之辰銀篝申申神鬼荒唐之會金縷綿  
綿維時聽者忘疲觀者擊節柑酒之游累夕梨園之賞  
盈箱後詢知爲半魯填詞咸嘖嘖稱道不置此春燈雅  
劇所由作也嗟乎雲烟過眼總屬陳因泥雪畱痕重尋  
剩語今年冬月出原稿見示將錄而存之僕才非竹屋  
命少金星吹玉尺而脣寒按瑤徽而手仙讀小令長篇  
之作比陽阿激楚之音用綴駢言聊當蝸和趁此夕紅

燈綠酒試操小海南來待幾時  
缺撥銅琶高唱大江東  
去